



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

BIU Santé
Médecine
Paris

QUÆSTIO MEDICA,

CARDINALITIIS DISPUTATIONIBUS
*manè discutienda in Scholis Medicorum, die Jovis decimâ tertiâ
mensis Martii, anno Domini M. DCC. LXXXIII.*

M^o. JOANNE - BAPTISTA LANGLOIS,
M^{ri}. JOANNIS-BAPTISTÆ ELIE DE LA POTERIE, vices gerente,
Doctore Medico, Præside.

An redeunte Vere citò redeat Convalescenti sanitas?

I.

PRÆCIPITI cursu labuntur tempora ; rapido solis motu metiuntur
& dies & horæ : hujus exacto celeriter orbe revolvitur annus. Sed
hic dum fugam properat , unus non est illius tenor. Sol etenim à quo
dیمانant vitæ flumina , easdem terræ regiones benigno non semper

* Propugnata anno 1729.

recreat aspectu : hinc pro variis anni temporibus variæ apparent universi facies tempestatum nomine designatæ. Ast harum cœli mutationum impatiens non est viventium genus, diversas quoque subit vicissitudines, diversis afficitur modis. Æstas fervida cuncta corripit, aret ager, sitientes moriuntur herbæ. Tum in scenam prodit Autumnus insalubris, qui humiditate & inconstantia ferox, quas ingenti cum apparatu è gremio deprompserat & ostentaverat opes natura, abripit & dilacerat. Mox aspera regnat Hyems; rigent arva, penetrabile frigus adurit plantas, nullæ aut herbæ campis apparent aut frondes arboribus, latet informis humus aggeribus niveis & alto gelu sepulta. Tandem solvitur acris hyems gratâ vice Veris & favoni, nec prata canis albicant pruinis. Jam redeunt grata Veris tempora. Sol tepenti lumine rigentes refocillat terras, convalescit natura, exhilaratur, repuerascit.

I I.

VERE novo qui modo lugebat, nunc ridet universus orbis : Quæ gelu induratæ squallebant terræ, nunc lætis distinguuntur coloribus. Non alios primâ crescentis origine mundi illuxisse dies, aliumque habuisse tenorem credideris. . . . mundi natalia festivis diebus naturam celebrare diceres. Luxuriat omne vegetabilium genus. Exultant omnes animalium familiæ. Vere alma Venus colitur, Venerem genus omne volantum sentit. . . . Vere tument terræ, genitalia semina poscunt. Tum Pater omnipotens sæcundis imbribus, æther, conjugis in gremium latæ descendit & omnes, magnus alit magno commixtus corpore fruges. Avia tum resonant avibus virgulta canoris. Parturit almus ager zephyrique tepentibus auris laxant arva sinus. . . . inque novos soles audent se gramina tutò credere, nec metuit surgentes pampinus austros, sed trudit gemmas, sed frondes explicat omnes. . . . & lentæ texunt umbracula vites. . . . Vere novo lætis pubescunt floribus arva. . . . floret odoratis terra benigna rosis. . . . tunc omnis ager, tunc omnis parturit arbos, tunc frondent silvæ, tunc formosissimus annus.

I I I.

NON minori cum imperio in hominum corpora dominantur tempestatum vices : suos quoque patiuntur affectus. Delicatiorem illorum fabricam inclementis cœli viribus resistere parem ne credas. Æstate igneus calor urit præcordia & artus depascitur, fibrarum remittitur tonus, perit sua fluidis consistentia, subtilis nimium rariorque sanguis vetitos & devios lymphæ canales errando subit & longius progredi impotens stagnat, corrumpitur; sic grassantur inflammatio, gangrana, sphacelus. Nimio cœstu evolvuntur humorum principia, acre-

dinem concipiunt, vasa corroduct & irritant; hinc febrium putridarum terris incubat cohors. Humidâ Autumnî temperie madefactæ resolvuntur fibræ. Humore jam satis imbutus aër humidus corporis halitus agrè & invitus excipit. Hinc præpeditâ perspiratione effectisque fibrarum viribus vitalis languet motus, tabis, hydropis, melancholiæ infelix prodromus. Exhalanda materies modò hærens in vasis diro partes excruiat rhumatismo; modò quâ datâ portâ ruens vergit ad intestina dysenteriam, diarrhæas excitatura. Adest Hyems: frigore rigescunt fibræ, condensantur humores, præcluduntur cutis spiracula. Quid indè? furit tempestas periculorum plenissima; serosa aggeritur colluvies, quæ intra vasa coercita sævit. Corysâ & gravedine nares, fauces raucedine corripit, bronchiorum glandulas infarciendo pulmones tussi fatigat, ipsius halitibus præcludendo vias aut dolosam invehit peripneumoniam notham, aut pulmonalem phthisim clam serpentem suscitât, articulos torquet doloribus. Jam verò quis te tantis agitarum procellis excipiet portus? certam ex Veris reditu salutem expecta, nec spem Convalescentis decipiet dudum cognita erga omnem naturam Veris benignitas & clementia.

I V.

ERGO-NE dum redeunte Vere omnis reviviscit natura, solus homo frigeret? eò-ne devenerit gentis humanæ calamitas, ut dum aliarum tempestatum injuriis gravissimis mulctatur affectibus, illius tempestatis quæ omnium benignissima est, non recrearetur adventu? leuia quæ convalescentem stipant symptomata, renascentis Veris facile parebunt imperio capefcentque fugam. Convalescentem exercent fastidiosæ morborum proles languor & tædium: vires votis impares ipsum sæpè defraudant, ambulaturus procedit? Subripiunt se se corpori pedes: thalamo decumbentem somnus diu fugit; efflagitatos respuit cibos: exoptulata amicorum colloquia imbelles fatigant aures: sed in tenui res est. Macte animo, & cuncta Veri perficienda committe. Vere quem inspiras aër, non nimio infectus humore, sed benigno rore madens rigentes emollit fibras; concretos eliquat humores; frigore nec pulmonis nec cutis spiracula constringuntur: avolantes non reprimuntur particulae nec nimio calore retinendæ dissipantur. At tepido Veris calore humores fluxiles evadunt, non nimium rarefacti: flexiles redduntur fibræ, non resolvuntur. Reserantur incernicula; viget secretionum opus, inutiles noxiæque partes foras amandantur; jam defæcator sanguis spiritus animales non ut ante, vappidos & effetos parcè subministrat, sed vividos, sed generosos qui affatim & copiosè in omnes corporis partes influentes ipsas vitali motu perfundunt, & exoptatæ sanitatis reddunt participes.

N E C satis. Id omne aut dulce aut utile quod in omnem naturam benigna refundunt Veris tempora, in hominis Convalescentis emolumentum cedit. Ianubila cœli facies puroque ridens lumine, pulsus aquilonibus lenè spirantes zephiri Convalescentis exhilarant sensus, animumque blandè afficiunt. Campi herbis & floribus latè gratum odorem spargentibus variegati balsamicis halitibus salubriorem efficiunt aëris usuram. Convalescentem piget de die in diem domi stare: Audet patienti se committere aëri; crastinâ die citius exiturus recta subit quasi invitatus; mox omnia delibatus exercitii commoda, esurit: arridet palato cibis: juniores herbæ non grave stomacho facescunt negotium: animalia delicatioribus suavioribusque alimentis pasta delicatiorum & suaviorem suppeditant succum. Tum lecto componitur: ultrò somnus advolat, & altâ quiete profundit artus. Sic suæ ipsi citò restituantur vires. At morbi tenaciores reliquæ hærent corpori? ipsa quoque Ver excutiet: si totum tabe fuerit affectum corpus aut pars aliquâ graviore labe tentata, vaccæ. capræ, asinæ ubera Pharmacopolarum pixidibus potiora Vere porrigunt: si crassior lentescensque sanguis aliquâ infarferit viscera, aquæ ab ipsâ naturâ medicatæ, quibus cum reduce Vere redit energia, voris cumulum addent. Sed ne nos Veri nimium blandiri putes; sui sunt & Veri morbi, sed ni speciali miasmate inficiatur aër, plerique salubres habendi; sæpè etenim sunt naturæ conamina quæ nedum lædent naturam ipsam expediunt.

Ergo redeunte Vere citò redit Convalescenti sanitas.

Proponebat Parisiis, ANTONIUS-PETRUS DEMOURS, Parisinus
Regis Christianissimi Medicus oculus designatus, Saluberrimæ Facultatis
Medicinæ Parisiensis Baccalaureus,

A. R. S. H. 1783. AB OCTAVA AD MERIDIEM.



Typis QUILLAU, Saluberrimæ Facultatis Medicinæ Typographi 1783.